

Սրա այլ ապացույցները տալիս են օրհնանքները և բարի մաղթանքներն ու անէծքները, որոնցով կարելի էր մի կողմից խրախուսել լուսի, գիշերվա («բարի լո՛ւս», «բարի գիշե՛ր», «բարի հաջողո՛ւմ») ու ամեն աշխատանքի նպաստավոր ընթացքը կամ ընդհակառակն՝ առաջ բերել վնասում և ապաբախտություն՝

«Ձէոքրտ շօրանա՛»:

Հմայիլներ մեծ տարածում ունեին նաև սեր, ատելություն, միացնելու, անջատելու, զզվանք, խելագարություն, մահ և այլ շարիք կամ բարիք հարուցանելու նպատակներով: Սակայն օրհնանքի կամ անեծքի խոսքերի ուժը կախված էր արտասանողից. այսպես՝ առանձին էֆեկտիվությամբ ազդելու զորություն վերագրվում էր քահանայի կամ մոլլայի խոսքերին, իբրև նախնական կախարհի կերպարի վերապրուկի: Այս զորությունը տարբեր էր բաշխված և հասակների մեջ, նույնիսկ սեռերի մեջ՝ ծերերի և պառավների, տղամարդու և կնոջ օրհնանքն ու անեծքը ավելի զորավոր էին, քան թե ավելի երիտասարդ տարիք ունեցողներինը, կանանցն ավելի, քան տղամարդկանցը:

Հավատում էին, որ բոլոր մարդիկ օժտված էին ուրիշների գործերի վրա ազդելու ունակությամբ, ունեին մի շնորհք՝ «մանա», որը, սակայն, հավասարապես բաժանված չէր բոլորի մեջ: Այսպես, կային և մարդիկ, որոնք ունեին քէքէվ ձէոք: Թէքէվ ձէոք ունեցողին էին դիմում, օրինակ՝ մեղրը փեթակից հանելիս կամ նոր փեթակի մեջ նոր մայր մեղու նստեցնելու միջոցին, շատ անգամ նոր տուն շինելիս՝ հիմքի առաջին քարը դնելիս: Կան և թեթե ու ծանր՝ բարի ու չար ոտք ունեցող մարդիկ: Վերջիններից, մանավանդ, վախենում էին երկուշաբթի օրը, չիհի՛ թե նրանց ներգործության տակ ամբողջ շաբաթն անհաջող անցնի: Չախի և աջի մեջ տարբերություն էր դրվում: Չախ աչքով նայել, նշանակում էր ճիշտ չհասկանալ, ճիշտ չտեսնել և նույնիսկ անբարյացակամ ազդել: Չախ ձեռքով մի բան մատուցանել՝ դժկամությամբ մատուցած էր համարվում, ինչպես ձախ ձեռքով շինածն անբավարար և անփուլթ շինած: Չախ ոտքով առավոտյան անկողնուց վեր կենալն ամբողջ օրը գործերի անհաջողություն էր նշանակում: Տան փոքր հարսը կամ աղջիկը մեծերի կամ հյուրերի ոտքերը լվանալիս պիտի աջ ոտից սկսեին: Այսպիսով, մարդու մարմնի մասերին ևս հատկացվում էր տարբեր զորություն—աչքը, ձեռքը, ոտքը, աջն ու ձախը, ինչպես և մարդու խոսքը՝ բանավորը թե գրավորը, ամեն մարդու մեջ ունեն տարբեր զորություն, այսպես ասած՝ բնությունից ստացած: Այս կարգի տարբերությունն է նաև մեկի՝ մի այլ մարդու գործունեության վրա լավ կամ վատ ազդելը: Մարդուց մի հատկություն կարող էր այս կամ այն եղանակով անցնել մյուսին, վարակիչ լինել¹²⁶: Այսպես, օրինակ՝ չբերությունը կամ բազմածնությունը, որը կարող էր անցնել մեկից մյուսին՝ շրջապատը, վարակիչ էր: Չբեր կին ունեցող մեկը չպիտի դուրս բերի փարդայի հետևից նորահարսին և կանգնեցնի փեսացուի կողքին, որպեսզի նրա չբերությունը չանցնի պսակվողին: Այն տանից, որտեղ կինը երկվորյակ է ծնած եղել, հաց էին վերցնում երեխային նրա մեջ շինած ծակով անցկացնելու համար: Նորահարսի ծնկներին նստեցրած տղան իր տղայությունը կարող էր հաղորդել ամուսնությունից սպասվող ծնունդին: Այսպիսով կարելի էր իր սեռային հատկությունն էլ տալ ուրիշին, նույնիսկ կենդանուն: Եթե հավին թուխս նստեցնելիս ներս մտներ մի կին՝ ձվից պիտի դուրս գային վառեկներ, եթե մի տղա-

¹²⁶ Կոնտագիոզ կամ վարակիչ մազիա: